

რა არის სამოქალაქო იარაღი?

სამოქალაქო იარაღი, რომელიც განკუთვნილია ფიზიკურ პირთა მიერ თავდაცვის, სანადირო, სპორტული და საკოლექციო მიზნებით გამოყენებისათვის.

სამოქალაქო იარაღის სახეებია:

- არაავტომატური მოკლელულიანი ცეცხლსასროლი იარაღი - პისტოლეტი ან რევოლვერი (მათ შორის, საფანტის იარაღი);
- გაზის (აირის) იარაღი - ლულაში ან დოლურაში ჭურვის ანდა საფანტის ჭურვების გასროლის გამომრიცხავი სპეციალური სტაციონარული მზლუდავის მქონე იარაღი (პისტოლეტი ან რევოლვერი), რომელიც განკუთვნილია ცრემლმდენი ან გამაღიზიანებელი ნივთიერებებით ცოცხალი ობიექტის დროებით მწყობრიდან გამოსაყვანად;
- სპორტული მოკლელულიანი არაავტომატური ცეცხლსასროლი იარაღი;
- სპორტული გრძელულიანი არაავტომატური ცეცხლსასროლი იარაღი;
- სპორტული პნევმატური იარაღი;
- სანადირო არაავტომატური გლუვულიანი ცეცხლსასროლი იარაღი (თოფი);
- სანადირო არაავტომატური ხრახნილულიანი ცეცხლსასროლი იარაღი (კარაბინი ან შაშხანა);
- სანადირო არაავტომატური კომბინირებული ცეცხლსასროლი იარაღი (ხრახნილულიანი და გლუვულიანი თოფი).

საკოლექციო იარაღი

საკოლექციო იარაღი, რომელსაც აქვს სამეცნიერო, ისტორიული, მხატვრული ღირებულება და რომლის დანიშნულებაც კოლექციის შექმნა და ექსპონირება;

სასიგნალო იარაღი

სასიგნალო იარაღი ან მოწყობილობა, რომელიც განკუთვნილია შუქ-ხმოვანი და კვამლური სიგნალის მისაწოდებლად;

სამოქალაქო იარაღის ბრუნვის შეზღუდვა

აკრძალულია სამოქალაქო იარაღად გამოყენებულ იქნეს:

- ცეცხლსასროლი იარაღი, რომელსაც აქვს სხვა საგნის იმიტირებული ფორმა;
- კასტეტი და სხვა მსგავსი დასარტყამ-დამაქუცმაცებელი (დამამსხვრეველი) საგნები;
- საბრძოლო მასალა, რომელსაც აქვს ჯავშანგამტანი, ცეცხლგამჩენი, აფეთქებითი ან ტრასირებული მოქმედების ძალა;
- იარაღი და სხვა მოწყობილობანი, რომელთა მოქმედების ძალა ემყარება ელექტროენერგიას, რადიოაქტიურ გამოსხივებას ან ბიოლოგიურ ფაქტორებს;
- გაზის (აირის) იარაღი, რომელიც აღჭურვილია ნერვულ-პარალიტიკური (დამბლადამცემი), მომწამვლელი ან სხვა ძლიერმოქმედი ნივთიერებებით;
- პნევმატური იარაღი, რომლის ტექნიკური მახასიათებლები არ შეესაბამება საქართველოს კანონმდებლობით დადგენილ მოთხოვნებს;
- მოწყობილობა, რომელიც გამოიყენება სროლის ხმის დასახშობად;
- გრძელლულიანი ავტომატური ცეცხლსასროლი იარაღი;
- მართლსაწინააღმდეგოდ დამზადებული ცეცხლსასროლი ან გაზის (აირის) იარაღი;
- იარაღი, რომელიც არ შეესაბამება საქართველოს კანონმდებლობით დადგენილ მახასიათებლებს.

სამოქალაქო იარაღისა და საბრძოლო მასალის იმპორტის, ექსპორტის, რე-ექსპორტისა და ტრანზიტის განხორციელება

კერძო სამართლის იურიდიულ პირთა ან ინდივიდუალურ მეწარმეთა მიერ სამოქალაქო იარაღისა და საბრძოლო მასალის იმპორტი, ექსპორტი, რე-

ექსპორტი და ტრანზიტი ხორციელდება საქართველოს თავდაცვის სამინისტროს მიერ გაცემული ნებართვის საფუძველზე.

იმპორტის, ექსპორტის, რე-ექსპორტისა და ტრანზიტის ნებართვას ექვემდებარება:

- სამოქალაქო იარაღი;
- ცეცხლსასროლი იარაღის ძირითადი ელემენტები – ლულა, დოლურა, ჩამკეტი, ჩარჩო, ლულის კოლოფი;
- საბრძოლო მასალა - მოწყობილობა ან საგანი, რომელიც შედგება მაინციირებელი ფეთქებადი ნივთიერებისა და ჭურვისაგან (ჭურვებისაგან) და კონსტრუქციულად განკუთვნილია მისი იარაღიდან გასროლის შედეგად ობიექტის დასაზიანებლად ან/და გასანადგურებლად;
- საბრძოლო მასალის ძირითადი ელემენტები - მაინციირებელი ფეთქებადი ნივთიერება, ჭურვი, მასრა, კაფსულა;
- სამხედრო ტექნიკა - ცეცხლსასროლი იარაღის როგორც ძირითადი, ისე არაძირითადი ელემენტების ან/და იარაღის წარმოებისათვის განკუთვნილი დანადგარები.
- ტექნიკური დოკუმენტაცია;
- იარაღის წარმოებასთან დაკავშირებული სამუშაოები და მომსახურება.
- ზემოაღნიშნული ნებართვების მაძიებელს (გარდა ტრანზიტის ნებართვის მაძიებლისა) უნდა ჰქონდეს **შესაბამისი საქმიანობის ლიცენზია**

შენიშვნა:

ზემოაღნიშნულ ნებართვას არ საჭიროებს საქართველოს კანონმდებლობით სამოქალაქო ბრუნვაში დაშვებული აეროზოლური მოწყობილობა და პნევმატური იარაღი, აგრეთვე სასიგნალო იარაღი (მოწყობილობა).

იმპორტის, ექსპორტის, რე-ექსპორტისა და ტრანზიტის ნებართვის გაცემის ეტაპები:

I ეტაპი:

ნებართვის მაძიებელმა უნდა მოიპოვოს **რეკომენდაცია**, რისთვისაც უნდა მიმართოს საქართველოს თავდაცვის სამინისტროს სამხედრო-ტექნიკურ საკითხთა მუდმივიმოქმედ კომისიას, რომლის უფლებამოსილებას, საქმიანობის წესსა და კომისიის გადაწყვეტილების მიღების პროცედურებს განსაზღვრავს კომისიის დებულება (საქართველოს თავდაცვის მინისტრის ბრძანება №65

29.08.2014 „საქართველოს თავდაცვის სამინისტროს სამხედრო-ტექნიკურ საკითხთა მუდმივმოქმედი კომისიის დებულების დამტკიცების თაობაზე“).

რეკომენდაციის მოსაპოვებლად წარსადგენი დოკუმენტაცია

რეკომენდაციის მისაღებად განმცხადებელი ვალდებულია კომისიას წარუდგინოს განცხადება.

განცხადება უნდა იყოს წერილობითი ფორმის, წარდგენილ უნდა იქნეს სახელმწიფო ენაზე და უნდა შეიცავდეს:

- ა) კომისიის დასახელებას;
- ბ) განმცხადებლის ვინაობას ან დასახელებას, პირად ან საიდენტიფიკაციო ნომერს და მისამართს;
- გ) მოთხოვნას;
- დ) პროდუქციის დასახელებას და მის რაოდენობას/მოცულობას;
- ე) განმცხადებლის ხელმოწერას;
- ვ) განცხადებაზე დართული საბუთების ნუსხას, მათი არსებობის შემთხვევაში.

განცხადებას უნდა დაერთოს განცხადებაში მითითებული ინფორმაციის დამადასტურებელი, მათ შორის, სანებართვო ქმედებასთან დაკავშირებული დოკუმენტაცია, რომელიც განმცხადებელმა შესაძლებელია წარმოადგინოს დამოწმებული ასლების სახით, ხოლო კომისიის/კომისიის მდივნის მოთხოვნის შემთხვევაში დედნების სახით.

განმცხადებელს უფლება აქვს კომისიას წარუდგინოს ნებისმიერი დოკუმენტი/ინფორმაცია, რომელიც მისი შეხედულებისამებრ შეიცავს კომისიის რეკომენდაციის მიღებისათვის საჭირო დამატებით ინფორმაციას.

კომისია/კომისიის მდივანი უფლებამოსილია განმცხადებელს მოთხოვოს რეკომენდაციის მიღებისათვის საჭირო სხვა დამატებითი დოკუმენტი ან ინფორმაცია.

II ეტაპი

რეკომენდაციის მიღების შემდეგ ნებართვის მაძიებელი მიმართავს ნებართვის გამცემს - საქართველოს თავდაცვის სამინისტროს.

ნებართვის მისაღებად წარსადგენი დოკუმენტაცია:

- განცხადება;
- შესაბამისი საქმიანობის ლიცენზია;
- კერძო სამართლის იურიდიული პირისა და ინდივიდუალური მეწარმისათვის სახელმწიფო რეესტრიდან ამონაწერები;
- სანებართვო ქმედების შესაბამისი ხელშეკრულების ან განზრახულობათა ოქმის/ხელშეკრულების დედანი ან ამ ხელშეკრულების ან განზრახულობათა ოქმის/ხელშეკრულების საქართველოს კანონმდებლობით დადგენილი წესით დამოწმებული ასლი;
- უფლებამოსილი ორგანოს მიერ გაცემული საქონლის წარმოშობის სერტიფიკატი (გარდა საქართველოს თავდაცვის სამინისტროსთან არსებული სამხედრო-ტექნიკურ საკითხთა მუდმივმოქმედი კომისიის გადაწყვეტილებით განსაზღვრული შემთხვევებისა);
- ექსპორტის, იმპორტის ან რეექსპორტის ნებართვა, გაცემული შესაბამისი ქვეყნის უფლებამოსილი სახელმწიფო ორგანოს მიერ;
- იმ ქვეყნის უფლებამოსილი სახელმწიფო ორგანოს მიერ გაცემული საბოლოო მომხმარებლის სერტიფიკატი, სადაც ხორციელდება იმპორტი (გარდა იმ შემთხვევისა, როდესაც ნებართვის მაძიებელი ითხოვს იმპორტის ნებართვას);
- საქართველოს თავდაცვის სამინისტროსთან არსებული სამხედრო-ტექნიკურ საკითხთა მუდმივმოქმედი კომისიის რეკომენდაცია;
- სანებართვო მოსაკრებლის გადახდის დამადასტურებელი საბუთი (საბანკო ქვითარი).

შენიშვნა:

სანებართვო მოსაკრებელი გადახდილ უნდა იქნეს გარიგების ღირებულების შესაბამისად:

ა) 500 ლარიდან 10 მლნ ლარამდე – 0.5%;

ბ) 10 მლნ ლარიდან ზევით – 0.1%, მაგრამ არა უმეტეს 120 000 ლარისა.

გადახდა ხორციელდება ნებისმიერ ბანკში შემდეგ ანგარიშზე:

საქართველოს თავდაცვის სამინისტროს სახაზინო კოდი - **302 006 500**.